

NACRT

Na osnovu člana 58. stav 1. tačka h) Zakona o komunalnim djelatnostima („Službeni glasnik USK“, broj:4/11, 11/11, 6/12, 13/12 i 14/17) i člana 21. Zakona o lokalnoj samoupravi USK-a ("Službeni glasnik Unsko-sanskog kantona", broj:8/11), Gradsko vijeće grada Bosanska Krupa, na prijedlog Gradonačelnika, na svojoj _____ redovnoj sjednici održanoj dana ____2023.godine, donosi:

ODLUKU o javnim parkiralištima na području grada Bosanska Krupa

DIO PRVI-OPĆE ODREDBE

Član 1. (Predmet Odluke)

- (1) Odlukom o javnim parkiralištima na području grada Bosanska Krupa (u daljem tekstu: Odluka) uređuju:
- a) uslovi i način korištenja javnih parkirališta;
 - b) uslovi i način korištenja parking površina namijenjenih za parkiranje vozila stanara u objektima kolektivnog stanovanja;
 - c) kontrola korištenja javnih parkirališta;
 - d) nadzor i kaznene odredbe;
 - e) završne odredbe.
- (2) Djelatnost javnih parkirališta je komunalna djelatnost od javnog interesa, a mora se obavljati kontinuirano i u skladu sa zakonskim i podzakonskim propisima, te ovom Odlukom.

Član 2. (Načela obavljanja djelatnosti javnih parkirališta)

Djelatnost javnih parkirališta vrši se tako da osigura:

- a) trajno i kontinuirano obavljanje djelatnosti javnih parkirališta;
- b) kvalitet u obavljanju djelatnosti javnih parkirališta;
- c) održavanje prostora na kojem se obezbjeđuje obavljanje djelatnosti javnih parkirališta u stanju stalne funkcionalne sposobnosti;
- d) formiranje visine naknade za obavljanje djelatnosti javnih parkirališta, kojom se obezbjeđuje samoodrživost, odnosno održivi razvoj;
- e) javnost i transparentnost rada.

Član 3. (Definicija djelatnosti javnih parkirališta)

- (1) Pod obavljanjem djelatnosti javnih parkirališta iz ove Odluke podrazumijevaju se poslovi održavanja prostora na kojima se pružaju usluge parkiranja motornih vozila.
- (2) Pod prostorom iz stava (1) ovog člana podrazumijeva se javna površina određena isključivo za parkiranje motornih vozila, sa propisanim režimom korištenja i plaćanja naknade za korištenje.

Član 4. (Davalac usluge)

- (1) Obavljanje komunalne djelatnosti javnih parkirališta na području grada Bosanska Krupa povjereno je JKP „10 Julić“ d.o.o. Bosanska Krupa (u daljem tekstu: davalac usluge).
- (2) Davalac usluge je dužan voditi brigu o javnim parkiralištima na slijedeći način:
- a) održavati vertikalnu i horizontalnu saobraćajnu signalizaciju
 - b) održavati čistoću na javnim parkiralištima
 - c) održavati javna parkirališta u zimskim uvjetima.
- (3) Davalac usluge nema obavezu čuvanja vozila i ne snosi odgovornost za oštećenje ili krađu vozila.
- (4) Visinu cijene za korištenje usluga javnih parkirališta, u smislu ove Odluke, utvrđuje davalac usluge, uz predhodnu saglasnost Gradskog vijeća Bosanska Krupa.

Član 5. (Korisnik usluge)

- (1) Korisnik usluge javnih parkirališta, u smislu odredbi ove Odluke je lice koje upravlja motornim vozilom ili vlasnik motornog vozila koje parkira vozilo na parkirno mjesto (u daljem tekstu: korisnik).
- (2) Parkiranjem vozila na parkirno mjesto korisnik prihvaća uslove parkiranja propisane ovom Odlukom.
- (3) Korisnik usluge dužan je platiti davaocu usluge cijenu za korištenje usluga javnih parkirališta.

DIO DRUGI – USLOVI I NAČIN KORIŠTENJA JAVNIH PARKIRALIŠTA

Član 6. (Parking mjesta i cijena parkinga)

- (1) Javna parkirališta na kojima se pruža usluga parkiranja na području grada Bosanska Krupa, uz naplatu, svrstana su u tri parking zone kako je navedeno u aneksu I. ove Odluke.

Član 7. (Radno vrijeme javnih parkirališta)

Radno vrijeme javnih parkirališta se određuje uzavisnosti od parking zone i to:

a) u nultoj i prvoj parking zoni :

1) od 07 h do 22 h u zimskom periodu (od 01.10.do 30.04.)

2) od 07 h do 24 h u ljetnom periodu (od 01.05. do 30.09.)

b) u II, parking zoni:od 07 h do 19 h.

Član 8. (Vertikalna i horizontalna saobraćajna signalizacija)

- (1) Javna parkirališta iz člana 6. ove Odluke označena su horizontalnom i vertikalnom

saobraćajnom signalizacijom, u skladu sa propisima o sigurnosti saobraćaja.

(2) Vertikalna saobraćajna signalizacija sadrži:

- a) oznaku „P“ (parkiralište)- skraćeni naziv parkirališta
- b) broj parkirne zone
- c) upozorenje o obaveznoj naplati usluga parkiranja
- d) cijenu usluga javnih parkirališta
- e) upozorenje da će vozila parkirana na nedozvoljenim (neobilježenim) mjestima biti blokirana uređajem za blokiranje točkova - „liscama“
- f) radno vrijeme naplate usluge parkiranja.

(3) Horizontalna saobraćajna signalizacija označava se u skladu sa propisima o sigurnosti saobraćaja.

(4) Korisnik je dužan vozilo parkirati u skladu sa vertikalnom i horizontalnom signalizacijom, odnosno u skladu sa uputama koje mu daje ovlaštena službena osoba davaoca usluge, ako parkiralište nema horizontalnu signalizaciju (ako podloga parkirališta nije asfaltirana ili betonirana).

Član 9.

(Parkirna mjesta za osobe sa invaliditetom)

(1) Na svakom javnom parkiralištu određuju se najmanje jedno parking mjesto za osobe sa invaliditetom.

(2) Vozilo kojim upravlja osoba sa invaliditetom može se parkirati na javnim parkiralištima, odnosno na parking mjestima posebno obilježenim za osobe sa invaliditetom bez plaćanja parkirne karte, uz posjedovanje znaka pristupačnosti.

(3) Uslovi za dobijanje znaka pristupačnosti, njegov oblik i sadržaj propisani su Pravilnikom o načinu obilježavanja vozila kojima upravlja osoba s oštećenim ekstremitetima („Službene novine FBiH“, broj:13/07 i 78/07).

(4) Vozilo parkirano na parkirnom mjestu označenom za osobu sa invaliditetom, a koje nema vidno istaknut znak pristupačnosti, bit će blokirano uređajem za blokiranje točkova - „liscama“, a troškove deblokade snosi korisnik usluge vlasnik parkiranog vozila odnosno lice koje upravlja vozilom.

Član 10.

(Posebna parkirališta)

Posebna parkirališta na području Grada Bosanska Krupa su:

a) za autobuse i teretna motorna vozila:

- u ulici Generala Mirsada Sedića na prostoru iznad bivše zgrade željezničke stanice i u krugu autobusne stanice,

b) vozila kojima se vrši prijevoz opasnih materija

- u ulici Bihaćka , na prostoru više Kapetanovog jezera s lijeve strane iz pravca Bosanska Krupa – Bihać.

Prostor za zaustavljanje i parkiranje ovih vozila mora biti označen odgovarajućim prometnim znacima.

c) taksi stajališta:

- na Trgu Reisa Ul.uleme DŽ. Čauševića, preko puta Doma zdravlja - 1 (jedno) parking mjesta,

- plato nove autobusne stanice Bosanska Krupa - 3 (tri) parking mjesta

- parking prostor ispred pošte u Bosanskoj Otoci u ulici Čaršija – 2 (dva) parking mjesta.

Član 11.
(Satna i dnevna parkirna karta)

- (1) Korisnik plaća uslugu korištenja javnih parkirališta unaprijed, kupovinom parkirne karte ili elektronskim putem.
- (2) Kod automatske naplate korisnik količinom ubačenih kovanica sam određuje dužinu plaćenog parkiranja sukladno vremenu ograničenja i kartu ističe na vidno mjesto ispod prednjeg vjetrobranskog stakla.
- (3) Kod automatske naplate korisniku bez ulaznog listića naplatit će se naknada kao da je vozilo parkirano od početka vremena parkiranja.
- (4) Parkirna karta je dokaz o uredno plaćenju naknadi za parkiranje na javnom parkiralištu.
- (5) Parkirna karta može biti satna i dnevna.
- (6) U periodu važenja parkirne karte vozilo sa satnom i dnevnom parkirnom kartom može biti parkirano na svim javnim parkiralištima na kojima se vrši naplata unutar zone za koju je parkirna karta izdata, i u zonama nižim od te.
- (7) Parkirna karta sadrži slijedeće podatke:
 - a) skraćenu oznaku davaoca usluge
 - b) serijski, odnosno, redni broj karte
 - c) datum izdavanja
 - d) vrijeme početka parkiranja
 - e) vrijeme trajanja parkiranja
 - f) obavijest o načinu isticanja parkirne karte
 - g) cijenu parkiranja.

Član 12.
(Mjesečne i godišnje parkirne karte)

- (1) Davalac usluge izdaje mjesečne i godišnje parkirne karte.
- (2) Parkirna karta iz stava (1) ovog člana izdaje se na osnovu podnesenog zahtjeva, uz koji se na uvid prilaže lična karta i saobraćajna dozvola.
- (3) Mjesečne i godišnje parkirne karte mogu se koristiti samo za vozilo za koje su izdate.
- (4) Mjesečna odnosno godišnja parkirna karta ima obilježje Grada Bosanska Krupa (ime i grb), naziv davaoca usluge, registarsku oznaku vozila, serijski broj, mjesec ili godinu važenja karte.
- (5) Korisnik mjesečne, odnosno godišnje parkirne karte dužan je istaći kartu u vozilu ispod prednjeg vjetrobranskog stakla.
- (6) U odgovarajućoj zoni parkiranja, vrijeme parkiranja za korisnike mjesečnih odnosno godišnjih karata je neograničeno.
- (7) Izdavanje mjesečne i godišnje parkirne karte ne obavezuje davaoca usluge da za iste obezbjedi kontinuirano slobodno parkirno mjesto.

Član 13.
(Načini plaćanja parkirne karte)

- (1) Visina cijene parkirne karte utvrđuje se ovisno od zone u kojoj se javno parkiralište nalazi.
- (2) Plaćanje parkirne karte na javnom parkiralištu vrši se putem: ovlaštene službene osobe davaoca usluge, automatski i mobilnog telefona, slanjem SMS poruka.
- (3) Parkirna karta na javnim parkiralištima ne plaća se nedjeljom i praznicima.

Član 14.
(Napлата putem ovlaštene službene osobe)

- (1) Kod naplate javnog parkirališta putem ovlaštene službene osobe davaoca usluge, korisnik unaprijed kupuje popunjenu parkirnu kartu od istog i ističe je na vidno mjesto ispod prednjeg vjetrobranskog stakla.
- (2) Ovlaštena službena osoba davaoca usluge mora imati identifikacionu legitimaciju, na kojoj je ispisan naziva davaoca usluge, serijski broj, ime i prezime i fotografiju službene osobe.

Član 15.
(Automatska naplata)

- (1) Kod automatske naplate javnog parkirališta, korisnik količinom ubačenih kovanica u parking automat sam određuje dužinu plaćenog parkiranja i parkirnu kartu ističe na vidno mjesto ispod prednjeg vjetrobranskog stakla.
- (2) Zabranjeno je blokiranje i oštećenje parking automata (ubacivanjem neodgovarajućih kovanica ili drugih materijala i vršenje bilo kakvih radnji kojim se oštećuje parking automat).

Član 16.
(Napлата putem mobilnog telefona)

Naplata javnog parkirališta putem mobilnog telefona slanjem SMS poruka, podrazumijeva elektronsku kupovinu parkirne karte prema uputama istaknutim na parking automatima, o čemu korisnik zaprima povratnu SMS poruku o plaćenju parkirnoj karti.

Član 17.
(Korištenje javnog parkirališta bez parkirne karte)

- Ukoliko u toku interventnih akcija koriste javno parkirališta, korištenje javnog parkirališta bez kupljene parkirne karte dozvoljeno je:
- a) službenim vozilima Ministarstva unutrašnjih poslova,
 - b) službenim vozilima Oružanih snaga BiH,
 - c) službenim vozilima Hitne pomoći,
 - d) službenim vatrogasnim vozilima,
 - e) službenim vozilima Državne agencije za istrage i zaštitu BiH i
 - f) službenim vozilima Kantonalnog tužilaštva Unsko-sanskog kantona.

DIO TREĆI-USLOVI I NAČIN KORIŠTENJA PARKING POVRŠINA NAMIJENJENIH ZA PARKIRANJE VOZILA STANARA U OBJEKTIMA KOLEKTIVNOG STANOVANJA I POSLOVNIH SUBJEKATA

Član 18.

(Parking površine namijenjene zaparkiranje vozila stanara)

(1) Parking površine namijenjene za parkiranje vozila stanara u objektima kolektivnog stanovanja i poslovnih subjekata navedene su u Aneksu II ove Odluke. Grafički prikaz parking površina za parkiranje vozila stanara u objektima kolektivnog stanovanja i poslovnih subjekata je sastavni dio ove Odluke i dat je u Aneksu II iste.

(2) Korištenje parking površina iz stava (1) ovog člana može se odobriti i pravnim licima i fizičkim licima, koja obavljaju samostalnu djelatnost.

Član 19. (Vertikalna saobraćajna signalizacija)

Parking površine iz člana 18. ove Odluke, označene su vertikalnom saobraćajnom signalizacijom, koja sadrži:

- a) oznaku lokacije parkinga (skraćeni naziv parkinga)
- b) znak zabrane parkiranja, osim vozila stanara i i pravnih lica, koja imaju odgovarajuću vinjetu
- c) upozorenje da će vozila bez uredno istaknute vinjete biti blokirana uređajem za blokiranje točkova-„liscama“.

Član 20. (Vinjeta)

(1) Parkiranje na parking površinama iz člana 18. ove Odluke, dozvoljeno je samo uz pravilno istaknutu važeću vinjetu.

(2) Vinjetu iz stava (1) ovog člana izdaje davalac usluge, a na osnovu zahtjeva korisnika usluge. Rok za podnošenje zahtjeva je 31. januara za tekuću kalendarsku godinu.

(3) Svaka vinjeta ima stilizovani grb Grada Bosanska Krupa, upisanu oznaku parkinga na koji se odnosi, te svoj serijski broj.

(4) Vinjetu je potrebno zalijepiti na vidnom dijelu vjetrobranskog stakla vozila za koje je vinjeta izdana, a korisniku je dozvoljeno parkiranje samo na parkingu na koji se odnosi predmetna vinjeta.

(5) Za svaku kalendarsku godinu izdat će se nove vinjete, koje će se izrađivati u različitim bojama.

(6) Korisnik je obavezan davaocu usluge prijaviti prodaju ili zamjenu vozila, te promjenu registarskih oznaka vozila za koje je vinjeta izdata.

(7) Parkiranje na parking površinama iz člana 18. ove Odluke ne podrazumijeva rezervaciju parking mjesta, niti davalac usluge odgovara za eventualno nastalu štetu ili krađu vozila.

Član 21. (Izdavanje vinjete)

(1) Pravo na vinjetu ima fizička osoba–stanar ukoliko na uvid priloži slijedeće dokumente:

- a) ličnu kartu,
- b) uvjerenje o prebivalištu-CIPS (ne starije od 6 mjeseci),
- c) važeću saobraćajnu dozvolu na ime podnosioca zahtjeva,
- d) dokaz da je vlasnik, odnosno korisnik stana na navedenoj adresi (ovjeren ugovor o vlasništvu,ovjeren ugovor o zakupu).

(2) Pravo na vinjetu ima pravno lice i fizičko lice koje obavlja samostalnu djelatnost, ukoliko nauvid priloži slijedeće dokumente:

- a) rješenje o registraciji društva,
- b) saobraćajnu dozvolu za službena vozila i

c) dokaz da je vlasnik odnosno korisnik poslovnog objekta na navedenoj adresi (ovjeren ugovor o vlasništvu, ovjeren ugovor o zakupu).

(3) Jedno fizičko lice ima pravo na jednu vinjetu.

(4) Jedno pravno lice ili fizičko lice koje obavlja samostalnu djelatnost, ima pravo na jednu vinjetu za službeno vozilo i dvije mobilne vinjete za korisnike usluga. Mobilne vinjete koriste se isključivo tokom radnog vremena pravnog lica ili fizičkog lica koje obavlja samostalnu djelatnost.

Član 22. **(Vinjeta za servisna vozila)**

(1) Radi intervencija u objektima kolektivnog stanovanja pravo na vinjetu za servisna vozila na parking površinama iz člana 18. ove Odluke, imaju pravna lica i fizička lica koja obavljaju samostalnu djelatnost.

(2) Vinjetu za servisna vozila izdaje davalac usluge, na osnovu podnesenog zahtjeva, uz koji se na uvid se prilažu slijedeći dokumenti:

- a) rješenje o registraciji društva i
- b) saobraćajna dozvola za službena vozila.

(3) Jedno pravno lice ili fizičko lice koje obavlja samostalnu djelatnost ima pravo na tri vinjete za servisna vozila.

(4) Vinjeta za servisna vozila se izdaje na period od jedan do dvanaest mjeseci, u toku tekuće kalendarske godine i važi za sve parking površine namijenjene za parkiranje vozila stanara u objektima kolektivnog stanovanja.

(5) Vinjeta za servisna vozila ima logo JKP "10 Juli" d.o.o. Bosanska Krupa, oznaku P (oznaka da važi za sve parking površine namijenjene za parkiranje vozila stanara u objektima kolektivnog stanovanja), serijski broj, registarsku oznaku vozila i period na koji se vinjeta izdaje.

Član 23. **(Privremena vinjeta - „gost vinjeta“)**

(1) Stanari u objektima kolektivnog stanovanja imaju pravo na kupovinu privremenih vinjeta - „gost vinjeta“. Privremene vinjete se mogu izdati na period od 15 dana.

(2) Privremenu vinjetu izdaje davalac usluge na pismeni zahtjev stanara u objektima kolektivnog stanovanja, uz predočenje adrese, odnosno oznake parkinga.

(3) Privremena vinjeta ima logo JKP "10 Juli" d.o.o. Bosanska Krupa, upisanu oznaku parkinga na koji se odnosi, serijski broj i period na koji se vinjeta izdaje.

Član 24. **(Parkiranje bez vinjete)**

Ukoliko u toku interventnih akcija koriste parking površine namijenjene za parkiranje vozila stanara u objektima kolektivnog stanovanja, parkiranje bez istaknute vinjete dozvoljeno je:

- a) službenim vozilima Ministarstva unutrašnjih poslova,
- b) službenim vozilima Oružanih snaga BiH,
- c) službenim vozilima Hitne pomoći,
- d) službenim vatrogasnim vozilima,

- e) službenim vozilima Državne agencije za istrage i zaštitu BiH i
- f) službenim vozilima Kantonalnog tužilaštva Unsko-sanskog kantona.

DIO ČETVRTI- KONTROLA KORIŠTENJA JAVNIH PARKIRALIŠTA, BLOKIRANJE I DEBLOKIRANJE VOZILA

Član 25. (Kontrolor)

Kontrolu pravilnosti korištenja javnih parkirališta iz člana 6. i parking površina iz člana 18. ove Odluke, dužni su da vrše kontrolori, koji moraju imati identifikacionu legitimaciju i odgovarajuću opremu koja omogućuje evidentiranje: mjesta i vremena parkiranja, marke, tipa i registarskih oznaka vozila.

Član 26. (Povreda uslova korištenja javnih parkirališta)

Korisnik usluge čini povredu uslova korištenja javnih parkirališta propisanih ovom Odlukom ako:

- a) vozilo nema istaknutu važeću vinjetu,
- b) vinjeta nije naljepljena,
- c) vinjeta ne odgovara lokaciji za koju je izdana,
- d) vinjeta ne odgovara vozilu za koje je izdana,
- e) parkira vozilo suprotno saobraćajnom znaku, horizontalnoj i vertikalnoj signalizaciji,
- f) ne istakne, nepravilno istakne ili istakne neodgovarajuću parkirnu kartu, s unutrašnje stranevjetrobranskog stakla vozila,
- g) prekorači dopušteno vrijeme parkiranja za više od 15 minuta,
- h) nepropisno parkira vozilo.

Član 27. (Blokiranje nepropisno parkiranog vozila)

(1) U slučaju povreda uslova korištenja javnih parkirališta iz člana 26. ove Odluke, ovlaštene službene osobe davaoca usluge izvršit će blokiranje vozila uređajem za blokiranje točkova – „liscicama“.

(2) Prije početka stavljanja uređaja za blokiranje točkova na vozilo, isto se fotografira u zoni kotača (blatobran, prednji dio vrata i sl.) kako bi se tačno utvrdilo u kakvom je stanju vozilo bilo prije stavljanja blokade. Fotografiranje se vrši radi sprečavanja eventualnih zahtjeva korisnika usluge za isplatu štete za oštećenja koja su već ranije bila na vozilu.

(3) O blokiranju vozila ovlaštena službena osoba davaoca usluge je dužna sačiniti zapisnik, u koji se unose podaci o stanju vozila prije i nakon blokade.

(4) Kod blokiranja vozila, ovlaštena službena osoba davaoca usluge je dužna, na prednje vjetrobransko staklo ili na drugo vidno mjesto, staviti obavijest da je vozilo blokirano sa uputom korisniku o daljnjem postupanju.

(5) Obavijest mora da sadrži: pravni osnov blokiranja, datum i vrijeme blokiranja vozila, lokacija parkirališta (broj parkirališta, adresa), marka vozila, registarska oznaka blokiranog vozila, kontakt telefon, način plaćanja naknade za deblokiranje, pouku o pravnom lijeku i postupak u slučaju neplaćanja troškova deblokiranja.

(6) Nakon blokiranja vozila, obavezno se fotografira blokirani kotač i cjelokupno vozilo sa vidljivom registracijom vozila

(7) Troškove blokiranja vozila snosi korisnik usluge.

Član 28. (Deblokiranje vozila)

(1) Po pozivu korisnika usluge, čije je vozilo blokirano, ovlaštene službene osobe davaoca usluge dužne su izvršiti deblokadu vozila, bez obzira da li je korisnik platio troškove deblokiranja ili ne.

(2) Nakon deblokade vozila, isto se fotografira i sačinjava zapisnik o deblokiranju kojeg potpisuju ovlaštena službena osoba davaoca usluge i korisnik usluge.

(3) Korisniku usluge koji nije državljanin BiH i korisniku usluge sa stranim registracijama, vozilo će se deblokirati nakon plaćenih troškova deblokade na licu mjesta.

Član 29. (Troškovi deblokiranja vozila)

(1) Troškove deblokiranja vozila snosi korisnik usluge.

(2) Troškovi deblokiranja mogu se:

a) platiti odmah, na licu mjesta, uz uredno izdati račun od strane ovlaštene službene osobe davaoca usluge

b) platiti u roku od osam dana.

(3) U slučaju da korisnik usluge u datom trenutku nema novaca za plaćanje troškova za deblokiranje vozila, uplatu troškova može izvršiti naknadno, u roku od osam dana u prostorijama davaoca usluge ili na transakcijski račun davaoca usluge.

(4) Ukoliko korisnik usluge u ostavljenom roku ne plati troškove deblokiranja, ovlaštena službena osoba davaoca usluge dužna je komunalnom inspektoru dostaviti dokaze (zapisnik o blokadi vozila, fotografije vozila, zapisnik o blokadi vozila, izvještaj o počinjenom prekršaju), radi pokretanja prekršajnog postupka.

(5) Na osnovu dostavljenih dokaza iz stava (4) ovog člana, komunalni inspektor pokreće prekršajni postupak u skladu sa odredbama Zakona o prekršajima FBiH („Službeni glasnik FBiH“ broj:63/14).

Član 30. (Sredstva ostvarena od prekršajnih naloga)

(1) Sredstva ostvarena po osnovu prekršajnih naloga izdatih temeljem odredaba ove Odluke su prihod Grada Bosanska Krupa i uplaćuju se na račun javnih prihoda gradskog Budžeta.

(2) Sredstva iz stava (1) ovog člana su namjenski prihodi, koji će se utrošiti za održavanje i nabavku opreme za javna parkirališta koja su predmet ove Odluke.

(3) U roku od trideset dana od dana stupanja na snagu ove Odluke, Grad Bosanska Krupa i davalac usluge zaključit će Ugovor, kojim će se definirati: namjena i način korištenja sredstava, dinamika i način isplate, odnosno prenosa sredstava, obaveza povrata sredstava u Budžet Grada u slučaju nenamjenskog utroška istih, izvještavanje, te kontrola i nadzor nad namjenskim utroškom sredstava.

DIO PETI- NADZOR I KAZNE NE ODREDBE

Član 31. (Nadzor)

Nadzor nad provođenjem ove Odluke i inspeksijski nadzor vrši Služba za komunalne djelatnosti, vode, zaštitu okoliša i inspeksijske poslove Grada Bosanska Krupa.

Član 32. (Prekršaj)

(1) Novčanom kaznom u iznosu od 100,00 KM – 500,00 KM kaznit će se za prekršaj korisnik usluge, ukoliko ne postupi u skladu sa odredbama člana 27. stav (7) i člana 29. stav (1) ove Odluke.

(2) Lice koje ošteti i blokira parking automat iz člana 15. ove Odluke, kaznit će se za prekršaj novčanom kaznom u iznosu od 500,00 KM do 1500,00 KM.

(3) Lice koje blokira parking automat iz člana 15. ove Odluke kaznit će se za prekršaj novčanom kaznom u iznosu od 100,00 KM do 300,00 KM.

(4) Novčanom kaznom u iznosu od 100,00 KM kaznit će se za prekršaj lice koje bez vinjete, "gost vinjete" parkira vozilo na površinama iz člana 18. ove Odluke.

DIO ŠESTI-ZAVRŠNE ODREDBE

Član 33.

U roku od trideset dana od dana stupanja na snagu ove Odluke, davalac usluge utvrdit će, cijenu pružanja usluga javnih parkirališta, kao i ostale naknade iz ove Odluke uz prethodno pribavljenu saglasnost Gradskog vijeća Bosanska Krupa.

Član 34. (Prestanak važenja ranijih propisa)

Stupanjem na snagu ove Odluke prestaje da važi Pravilnik o javnim parkiralištima na području Općine Bosanska Krupa broj :01/V-02-2049-14-1./10. od 13.05.2010.godine.

Član 35. (Stupanje na snagu)

Ova Odluka stupa na snagu danom objavljivanja u „Službenom glasniku grada Bosanska Krupa.“

**PREDSJEDAVAJUĆI GRADSKOG VIJEĆA
Alen Lipovača**

ANEKS I
JAVNA PARKIRALIŠTA NA KOJIMA SE PRUŽA USLUGA PARKIRANJA NA
PODRUČJU GRADA BOSANSKA KRUPA, UZ NAPLATU:

DIO A- JAVNA PARKIRALIŠTA U NULTOJ ZONI

R/br	Naziv parkinga	Šifra parkinga	Broj parking mjesta
1	ULICA MARŠALA TITA- OD RASKRISNICE SA ULICOM GENERALA IZETA NANIĆA DO RASKRSNICE NA TRGU REISA UL. ULEME DŽEMALUDINA ČAUŠEVIĆA SA LIJEVE STRANE U PRAVCU KRETANJA	JP-1- 0Z	29
2	PARKING PROSTOR U ULICI PATRIOTSKE LIGE OD PJEŠAČKE ZONE DO RASKRŠĆA SA ULICOM MARŠALA TITA	JP-2- 0Z	27
3	PARKING PROSTOR U ULICI SOKAK OD SEMAFORA DO SKRETANJA U ULICU VAHIDE MAGLAJLIĆ	JP-3- 0Z	45
4	PARKING PROSTOR U ULICI STARI GRAD, ŠIFRA PARKINGA	JP-4- 0Z	5
5	PARKING PROSTOR U ULICI ŠEHIDSKA, ŠIFRA PARKINGA	JP-5- 0Z	15

DIO B- JAVNA PARKIRALIŠTA U PARKING ZONI I

R/br	Naziv parkinga	Šifra parkinga	Broj parking mjesta
1.	PARKING U ULICI GENERALA MIRSADE SEDIĆA	JP-1-I Z	16
2.	PARKING PROSTOR U ULICI SOKAK OD SKRETANJA U ULICU VAHIDE MAGLAJLIĆ PA DO RASKRŠĆA SA ULICOM BIHAĆKA I 5.KORPUSA	JP-2-I Z	60
3.	PARKING PROSTOR U ULICI 505. VITEŠKE BRIGADE	JP-3-I Z	12
4	PARKING PROSTOR U ULICI TRG AVDE ČUKA KOD ZGRADE DOMA KULTURE	JP-1-I Z	45

ANEKS II
DIO A- PARKING POVRŠINE NAMIJENJENE ZA PARKIRANJE VOZILA STANARA U
OBJEKTIMA KOLEKTIVNOG STANOVANJA

R/b r	Naziv parkinga	Šifra parking a
1.	Parking prostor iza stambenih zgrada SP 32/I i SP 32/II u ulici 511. Slavne brdske brigade	P 1
2.	Parking prostor ispred i iza stambeno-poslovne zgrade SP 38 D u ulici 511. Slavne brdske brigade	P 2
3.	Parking prostor između stambeno poslovnih zgrada SP 20 D i SP 40 B u ulici 511. Slavne brdske brigade	P 3
4.	Parking prostor iza stambeno-poslovnih zgrada SP 30 ulaz I i II u ulici 550. Viteške brigade	P 4
5.	Parking prostor iza stambeno-poslovnih zgrada SP 30 ulaz III i IV u ulici 550. Viteške brigade	P 5
6.	Parking prostor kod kod stambenih zgrada "Lamele" u ulici Mirsada Crnkića	P 6
7.	Parking prostor iza stambeno- poslovnih zgrada SP 76, SP 78. i SP 8-10.	P 7
8.	Parking prostor ispred stambene zgrade "UNA II u ulici Pazadžik	P 8
9.	Parking prostor ispred stambene zgrade "UNA I u ulici Pazadžik	P 9
10	Parkinzi kod Izbor trgovine-bočno, kod zgrade SP 32/I i SP 32/II –bočno	P 10

ANEKS II - DIO B - GRAFIČKI PRIKAZ PARKING POVRŠINA NAMJENJENIH ZA
PARKIRANJE VOZILA STANARA U OBJEKTIMA KOLEKTIVNOG STANOVANJA

O b r a z l o ž e n j e

I - Pravni osnov

Pravni osnov za donošenje ove Odluke sadržan je u odredbama člana 58. stav 1. tačka h) Zakona o komunalnim djelatnostima („Službeni glasnik USK“, br: 4/11, 11/11, 6/12, 13/12 i 14/17) i člana 21. Zakona o lokalnoj samoupravi USK-a ("Službeni glasnik Unsko-sanskog kantona", broj:8/11).

Odredbom člana 58. stav 1. tačka h) Zakona o komunalnim djelatnostima („Službeni glasnik USK-a“, broj: 4/11, 11/11, 6/12, 13/12 i 14/17) je propisano:

“Posebnim općinskim odlukama reguliše se obavljanje slijedećih komunalnih djelatnosti individualne komunalne potrošnje:

h) djelatnost javnih parking prostora i javnih garaža.

Članom 21. Zakona o lokalnoj samoupravi USK-a ("Službeni glasnik Unsko-sanskog kantona", broj:8/11) je propisana nadležnost predstavničkog organa vlasti za donošenje odluka ovakvog karaktera.

II – Razlozi za donošenje

Razlozi za donošenje predmetne Odluke nalaze se u činjenici da je Općinsko vijeće Općine Bosanska Krupa ranije donijelo Pravilnik o javnim parkiralištima na području Općine Bosanska Krupa broj :01/V-02-2049-14-1./10. od 13.05.2010. godine koji ovom Odlukom prestaje da važi.

Obzirom da ranije nije donijeta Odluka o javnim parkiralištima na području grada Bosanska Krupa, nadležna Služba izradila je prijedlog navedene Odluke i to i na način da je vlastitim pravnim propisom regulisala predmetnu oblast.

Obzirom da je od donošenja posljednjeg propisa kojim je regulisana ova oblast došlo do promjene materijalnog zakona, kao i na veći broj primjedbi i sugestija upućenih od strane Gradskog vijeća, Policijske stanice Bosanska Krupa, privrednika kao i samih građana po pitanju parkiranja, cijeni se da postoji potreba za donošenjem nove odluke kojom će se ova oblast kvalitetno definisati i urediti.

Dana, 22.02.2023.godine u Maloj sali Doma kulture na adresi Trg Avde Ćuka, grad Bosanska Krupa sa početkom 12.00 sati je održana Javna rasprava na temu prednacrt Odluke o javnim parkiralištima na području grada Bosanska Krupa po Zaključku Gradskog vijeća grada Bosanska Krupa, broj:01-02-20-5/23 od 07.02.2023.godine.

Na Javnoj raspravi su bili prisutni:

- Semin Oraščanin, stručni saradnik u Gradskom vijeću grada Bosanska Krupa,
- Enisa Hadžifejzagić, viši referent u Gradskom vijeću grada Bosanska Krupa,
- Muhamed Mušeljić, vijećnik u Gradskom vijeću grada Bosanska Krupa,
- Aldijana Mahmić, šef Službe za komunalne djelatnosti, vode zaštitu okoliša i inspeksijske poslove,
- Sedina Fajić, komunalni inspektor
- Sabahudin Dizdarević, komunalni inspektor,
- Velagić Senad pripadnik MUP-a USK-a, ispred Pete policijske uprave Bosanska Krupa,
- Zumreta Porić, građanin
- Kadić Faruk, građanin
- Hasanagić Emina, građanin.

Javnu raspravu na temu prednacrt Odluke o javnim parkiralištima na području grada Bosanska Krupa je vodio ispred Službe za komunalne djelatnosti, vode, zaštitu okoliša i inspekcijske poslove Samir Sedić, stručni savjetnik za pravne poslove u istoj Službi.

Na početku javne rasprave voditelj je detaljno obrazložio prednacrt Odluke o javnim parkiralištima na području grada Bosanska Krupa, te je konstatirao da je u toku izrade samog prednacrt Odluke Služba za komunalne djelatnosti, vode, zaštitu okoliša i inspekcijske poslove zaprimila akt od strane Pete policijske uprave Bosanska Krupa, broj:05-04/11-1-03-4347/22 od 07.12.2022.godine koja se odnosi na regulaciju saobraćaja na području grada Bosanska Krupa to jeste na trenutni propis koji je na snazi a to je važeća Odluka o regulaciji cestovnog saobraćaja na području općine Bosanska Krupa („Službeni glasnik Općine Bosanska Krupa“, broj:8/12, 12/14, 2/16, 11717 i 7/21) a čiji sadržaj se može uvažiti i koristiti prilikom izrade samog nacrt Odluke o javnim parkiralištima na području grada Bosanska Krupa.

Aldijana Mahmić, šef Službe za komunalne djelatnosti, vode, zaštitu okoliša i inspekcijske poslove je detaljnije obrazložila određena tehnička rješenja po pitanju samog prednacrt, te istakla činjenicu da će tehnička lica Službe zajedno sa predstavnicima Pete policijske uprave grada Bosanska Krupa detaljno razmotriti sva predložena rješenja, te iznaći najprihvatljivije.

Muhamed Mušeljić, vijećnik u Gradskom vijeću grada Bosanska Krupa je predložio da u ulici Sokak se zabrani parkiranje sa desne strane ali da se gdje postoji mogućnost odrede parking mjesta i da se zabrani parkiranje sa desne strane od semafora do kuće Hotića.

Aldijana Mahmić, šef Službe za komunalne djelatnosti, vode, zaštitu okoliša i inspekcijske poslove je istakla činjenicu da je u toku rekonstrukcija ulice 511. Slavne brdske brigade i Trga Alije Izetbegovića i da će se ukinuti parking prostor ispred hotela „Ilma“ i da organ treba iznaći mogućnost novog parking prostora i da se razmišlja i o lokaciji Sokak ali da se tu treba voditi računa kako o interesima fizičkih lica to jeste stanovnika te ulice tako i o poslovnim subjektima koji posluju u pomenutoj ulici ali sa druge strane i o sigurnosti saobraćaja, te da će Služba svakako obaviti razgovor sa vlasnicima poslovnih objekata u ulici Sokak i probati naći na zakonu zasnovano rješenje. Što se tiče potencijalne parking zone u planu je da bude nekoliko parking mjesta u ulici Šehidska ovisno o rekonstrukciji Trga Alije Izetbegovića i u dijelu ulice Stari grad gdje je to tehnički moguće.

Zumreta Porić, građanin je istakla činjenicu da treba imati na umu činjenicu da se kao parking zona planira lokacija iza Doma kulture ali da treba imati u vidu i činjenicu da se tu parkiraju i uposlenici kako ustanove u kojoj radi tako i radnici Gradske uprave grada Bosanska Krupa i predlaže da se cijene usluge parkiranja korigiraju na neku pristupačniju cijenu i da ovo svoje pitanje upućuje ispred uposlenika JU „ Centra za kulturu, obrazovanje i informisanje“ Bosanska Krupa.

Hasanagić Emina, građanin kaže da ima poslovni prostor u ulici Stari grad i da je Služba koja provodi raspravu upoznata sa problemom sa kojim se susreću poslovni subjekti u toj ulici i traži da se razmotri mogućnost za planiranje četiri parking mjesta na početku ulice iz pravca Trga Alije Izetbegovića i da su poslovni subjekti spremni i platiti naknadu za parking prostor.

Nadležna služba je nakon održane javne rasprave i razmatranja svih sugestija i prijedloga sačinila predmetni nacrt Odluke i dostavlja ga Gradskom vijeću na razmatranje i odlučivanje.

III-OBRAZLOŽENJE PRAVNIH ODREDBA

DIO PRVI-OPĆE ODREDBE

Obuhvata odredbe od člana 1. do člana 5. Ove Odluke kojim je određen šta je to predmet Odluke, koja se tu načela obavljanja djelatnosti javnih parkirališta, definicija javnih parkirališta, ko je davalac usluga a ko korisnik usluge.

DIO DRUGI – USLOVI I NAČIN KORIŠTENJA JAVNIH PARKIRALIŠTA

Obuhvata odredbe od člana 6. do člana 17. ove Odluke kojim je uređeno pitanje koje su to parking zone, radno vrijeme javnih parkirališta. Ovim dijelom odluke je određeno kako se označava vertikalna i horizontalna saobraćajna signalizacija, kako se određuju parkirna mjesta za osobe sa invaliditetom, šta je to satna i dnevna parkirna karta, a šta mjesečna i godišnja parkirna karta, te način plaćanja parkirne karte. Također, je određeno kako se naplaćuje parkirna karta, te u kojim situacijama i ko može koristiti javna parkirališta bez parkirne karte.

DIO TREĆI-USLOVI I NAČIN KORIŠTENJA PARKING POVRŠINA NAMIJENJENIH ZA PARKIRANJE VOZILA STANARA U OBJEKTIMA KOLEKTIVNOG STANOVANJA I POSLOVNIH SUBJEKATA

Obuhvata odredbe od člana 18. do člana 24. ove Odluke kojim je uređeno koje su to parking površine namjenjene za parkiranje vozila stanara, šta je vertikalna saobraćajna signalizacija, definiran je pojam vinjete kroz nekoliko odredaba.

DIO ČETVRTI- KONTROLA KORIŠTENJA JAVNIH PARKIRALIŠTA, BLOKIRANJE I DEBLOKIRANJE VOZILA

Obuhvata odredbe od člana 25. do člana 30. ove Odluke kojim je određeno ko vrši kontrolu javnih parkirališta, koje su to povrede uslova korištenja javnih parkirališta, kada se vrši blokiranje nepropisno parkiranog vozila, kao i način deblokiranja vozila, te šta predstavlja troškove deblokiranja vozila, te da sredstva ostvarena po osnovu prekršajnih naloga izdatih temeljem odredaba ove Odluke su prihod Grada Bosanska Krupa i uplaćuju se na račun javnih prihoda gradskog Budžeta.

DIO PETI- NADZOR I KAZNE ODREDBE

Obuhvata odredbe od člana 31. i 32. ove Odluke kojim je uređeno pitanje nadzora nad provođenjem ove Odluke kao i koji su to novčane kazne za povredu odredaba ove Odluke.

DIO ŠESTI–ZAVRŠNE ODREDBE

Obuhvata odredbe od člana 33. i 34. Odluke kojim je propisano koji propis prestaje da važi i kad predmetna Odluka stupa na snagu.

Zbog obimnosti materije i jasnog pravnog domašaja svakog člana Odluke nije potrebno obrazložiti svaki član pojedinačno ali kroz sam tekst Odluke može se nedvojbeno utvrditi o čemu se u stvari radi i na koji način se planira realizovati.

III Finansijska sredstva

Za provođenje ove odluke u Budžetu grada Bosanska Krupa potrebno je osigurati posebna finansijska sredstva.